

ARUWANUWEN MWIICHENAP, AEWIN MWIICH ATAPWANAPWAN

A SUUK ME FIS WON OMOEN IS. TRUK STATE F.S.M. NON SARRU

AWANUWEN SEPTEMBER ENGOROU TIWEPUKU WANIK ME EW NAMOPUNG NO: 1-175

EW NAMOPUNG

A forata ew Authority non pekin ekefeitian anen moni tonong me nonomun aramas non Pafeng, a awora monien, me pwan ekkoch popun.

Epwe Pung me ren ewe Legislature-un Chuuk.

Tetten 1. Forutan ewe Authority. Iei a foruta an fonuwen non Pafeng ewe Social and Economic Development Authority, iei a iteni ewe Authority, ew public corporation fan pochokunan annukun Chuuk me Federated States of Micronesia.

Tetten 2. Popun ewe Authority. Ewe Authority epwe affata met mei auchea me non an we kinikinin nemenem me angang ren pekin angangen affefeita, iwe epwe afefeitai pekin moni, fan an pusin mwokutukut ika fan an pwan ekkoch, fiti aninis fongon me angang fongon me ewe Muun State me ewe Muunapen Federated States of Micronesia.

Tetten 3. Pochokunan me Wisan ewe Authority. Ewe Authority epwe eani ekkei tettenin pochokun me wiis:

a) Epwe wisan fori angangen affeten auchean need, affatatiw goals, draftini me apochokuna plans, otot, efefeitai, emwirinou, me anisi anen moni tonong me efefeitan nonomun aramasen Pafeng ren Nomwin, Ruo, Fananu me Murilo.

b) Epwe mumuta ngeni an epwe amwokutu sakkun angang watte mei kawor seni ewe State, Muunap me pwan ekkoch annuk ren fan iten ewe kinikin.

c) Ewe Authority a mumuta an epwe tungor, angei, nounou ika monsefani ngeni ewe State, ika National Government ika ekkoch anen moni mei kawor non monien aninis, monien nounoun ren an epwe efisi unusan ika nesopun popun ei annuk. Chinon chok ika mei affat non annuk, ekkei moni nupwen ar angei epwe tonong non ew kinikinin account.

d) Ewe Authority epwe awora pusin an records, research an mettochun me pwan met pisek ika property ren fonu ika neni ren an epwe atufichi an ewe Authority epwe tufich ne fori an angang. Fansoun an wor tungor seni ew Authority, chon angangen ei State me National Governments repwe tongeni asain ar repwe fori angangen ewe Authority. Chinoon chok ika mei affat, met expenses mei wor ewe Authority epwe monau murin ika riempursuni.

e) Ewe Authority epwe tongeni awora noun agents me noun chon an angang me awora contract ren ekkewe mei sinenap non pekin angang ren loon aramas me sakkun organization an epwe emweni me anisi ewe Authority me noun chon angang.

f) Awora emon Executive Director me emon Budget me Finance Officer, iwe pwan fori annukun ekkewe chon angang, pwan awora ekkoch chon angang mei affat me ren annuk, ika seni met auchean me ren ewe Board ren epwe fisioch an ewe Authority angang.

g) A tongeni angei non met napanap mei eoch me ren pungun annuk ekkewe fonu, pisek, imw ika neni, pwan ekkewe ekkoch sakkun pisek, ika met sakkun interest ren ekkewe mettoch; a pwan tongeni nemeni, tumunu me eaea ekkewe mettoch, ika pwan tongeni amomo, ika mutata an epwe saata ren an epwe eaea ika disposuni nupwen fansoun ewe Board a mefi pwe mei namot ngeni mwokutun an angang.

h) Forata, tumunu, amwokutu ika fori ekkewe angangen sopai epwe tongeni afisata ekkewe popun ewe Authority a mochen, pwan angei moon ekkewe angang, iwe ekkewe moni mei tonong epwe nomw non monienapen ewe Authority.

i) Fori pwan aani ekkoch knotrak ika pwan fori ekkewe sakkun atipeew ren pekin angang epwe namot ngeni ewe angang, me pwan met napanap a mefi pwe mei auchea.

j) Epwe tongeni paro moni non ekkoch fansoun nge an ewe Authority kewe niwinimang esap pwan nomw non tettenin an epwe an ewe Muun Chuuk ika an kewe kinikinin, pwan met monier ika pisekin ewe Muun Chuuk me kinikinin kewe esap pwan tongeni eea

ren kamusen an ewe Authority niwinimang chinon chok ika pwe mei affat non annuk.

k) Awora pwan angei niwinin, fees me pwan mon pisek mei kamono, me met services ewe Authority a fori, nge esap wor moni tonong seni ci angang epwe napanapen ew takisesin aramas, takisesin chon aeae ekkewe pisekin muun ika seni ekkewe pisek an ewe angang, nukun chok ika pwe mei mumuta seni annuk.

l) Fori, fiti pungun annukun ewe angang, ekkewe meinisin taropwe mei auchea ika namot ngeni poputan an angang.

m) Fori ekkewe ekkoch angang me eani ekkewe sekining mei namot ika murino ren apwonueta an kewe angang me wisan mei affat me ren annuk; pwan

n) Apungano napanapen, katoun me annukun angangen ewe Authority.

Tetten 4. Chon ewe Board. Meinisin pochokun mei nom ren ewe Authority epwe pwan nom ren ewe Board, epwe wor engon me unumon chon repwe iteni Directors epwe iei usun:

- 1) Magistrate non ekkewe ruanu Muun Fonu non kinikinin Pafong.
- 2) Chairman non ekkewe Municipal Councils non ekkewe ruwanu fonuwen non Pafeng.
- 3) Ekkewe fomon samon-Pun non ew me ew ekkwe ruanu Municipalities non Pafeng ika ioon kewe tupuur; pwan
- 4) Ewe monun non Legislature a finita seni ekkewe fonuwen Pafeng.

Tetten 5. Ottotun Monun ewe Board. Ewe Board, inet chok a tufich me mwirin an poputani pochokunan ei annuk, epwe ne aota ren an epwe finita, seni monun mwich emon Chairman pwan emon Vice-Chairman. Ewe Board epwe finata emon Secretary an epwe tumunu porausen mwichen ewe Board i esap chon ewe Board. Ewe Board epwe finata aukukun chon fiti mwich ren epwe tongeni fis mwich. Ewe Director epwe angei niwinin an angang ren met a nussuno nupwen an fori pungun wisan fiti pungunon me ren ewe Board. Napenon ewe Director epwe angei niwinin won engon-me-nimu chana ew ranin mwichen

ewe Board an fiti. Ewe Board epwe mwlich iteiten esap mang seni fan er non ew quarter non meni atun me menni neni epwe finita seni ewe Chairman. taropwen epwe katou usun met epwe affat non noun bylaws.

Tetten 6. Esap Pwan Wor Anen Moni Tonong Ngeni Monun me Chon Angang.

Esap wor Director, nouwis, ika chon angangen ewe Authority, seni pusin i ika noun agent me ion, epwe angei an aninis seni met an amomo, kamo, contract me och sakkun angangan ewe Authority.

Tetten 7. Kapung me Tupun non Kapung.

1) Ewe Authority a tongeni kapung ngeni emon, pwan pusin tur non kapung fan pusin itan, nge mettoch ika niwinimang an ewe Authority nupwen ese fori an ewe Muun Chuuk angang, esap pwan an ewe Muun Chuuk niwinimang ika sekining.

2) Ewe Attorney General non Muun Chuuk epwe wisen tupuni pwan anisi ewe Authority non pekin mettoch mei fiti annuk, chinoon chok ren met mei wor an conflict of interest won, ika met mei wenengeni.

Tetten 8. Nemenem.

1) Ewe Authority non an ewe Board epwe wisen mesemes won, epwe angei, annomu me tumunu, atou moni ika pisek mei kawor ngeni ewe Authority seni ekkoch pekin angang. Ewe Authority mei tongeni aea napanapen an muun tumunu noun taropwen moni ika procedures, ika pwan ekkoch sakkun napanapen tumunu taropwen moni mei foruta seni annuk ren pekin angangen kompeni.

2) Ewe Authority mei tongeni kamo an pisekin non offes, pisekin angang me ekkoch sakkun pisek, non an pwisin napanapen angangen kamo ika an muun, ika menni chok sakkun napanap epwe tufich.

Tetten 9. Budgetin Year. Ewe Board epwe fori pwan atononga an ewe Authority anapanapen budgetin fiscal ier non met napanapan mei affat me non annuk, usun mei fis ren ekkewe putain ewe Muun Chuuk nupwen ar fori pwan atononga ar budget. Ese mumuta an epwe tou me nounou watten moni seni met mei kawor, iwe ena foffor epwe tongeni tipis usun chok met napanap mei fis ren monien Muun Chuuk.

Tetten 10. Executive Director. Epwe wor emon Executive Director non ewe Authority, epwe finita seni ewe Board, pwan nom fan nemenian. Ewe Board epwe wisan fori ukukun niwinin ewe Executive Director. Ewe Executive Director epwe wisen tumunu angangen ekkewe programs me projects me pwan ekkoch angangen ewe Authority, iwe epwe pwan tongeni atononga, nemeni me atou chon angangen ewe Authority fiti pungun met annukun chon angangen ewe Board a affata, nukun chok meta a apasa non Tetten 11.

Tetten 11. Budget me Finance Officer. Ewe Executive Director epwe wisan finata emon Budget ika Finance Officer, fiti tipeewin ewe Board iwe ren anapanapen ewe wiis epwe affat non annuk. Ewe Budget ika Finance Officer epwe wisen angei pwan atou monien ewe Authority. Mwan an epwe ne fori wisan kewe, ewe Budget/Finance Officer epwe akkom fori ew pwon an ewe Authority epwe awora \$10,000 ika watte seni won ukukun ewe Board epwe finata. Ewe ukukun monien pon epwe for me ren ew ika ekkoch companien pwon ra tongeni fori, ir mei mumuta ar repwe pisanis non FSM, iwe napanapen taropwen epwe kap-nguno seni ewe Attorney General non Chuuk. Ewe Budget ika Finance Officer epwe fori wisan fan nemenien ewe Executive Director.

Tetten 12. Taropwen Moni. Ewe Board me ewe Executive Director repwe chufengen ne nengeni pwe ewe Budget me Finance Officer mei tumunu fichi taropwen me puken moni epwe pwarata moni tonong, moni tou, pisekin me noun moni, me an ewe Authority niwinimang, pachenong pwan ekkoch pisekin me monian. Ewe Board epwe fori an repot ngeni ewe Governor me ewe Speaker lon Legislature, esap mang seni one (60) ran me mwirin an saponu ewe fiscal year, non an we repot epwe affat meta ewe Authority a fori non ewe ier, ifa usun non ei ier, pwan met kan ewe Board a mefi pwe mei mwirino an epwe repotini. Ewe State Auditor, ika pwe ese wor emon, ewe emon mei wor noun naisin ren pekin chekin taropwen pisanis, epwe finita seni ewe Board, ren an epwe wisen cheki ika nengeni taropwen ewe Authority iteiten ier, iwe epwe repotini met kunaan ngeni ewe Governor me Speaker non ewe Legislature.

Tetten 13. An ewe Authority Takisis. Fan aukukun ewe nemenem ren for takises ewe pekin for annuk non Chuuk a tongeni fori, ewe Authority epwe pwan nomw non tettenin ew ekkewe pekin angangen muun, iwe epwe kapichino seni takisis, usun chok ew ekkewe pekin angangen muun ren an angang.

An ewe Authority angang a usun chok ew angangen sopai ika pinnis. nge ewe Authority epwe iteni pwe ew angangen sopai ese kutta wisan.

Tetten 14. Tumunun Chon Angang.

1) Ewe Authority epwe pwisin forata an annukun me napanapan tumunun noun chon angang, esap pwan fiti ewe Annukun Chon Angang non Chuuk, ika ewe Truk State Public Service System. Ewe Board mei tongeni fori an tungor ngeni ewe Governor, ren an epwe pwan pachenong non ewe Truk State Public Service System fan asengesin noun chon angang; nge, ika pwe ewe Authority mochen pwe epwe pachenong non ewe Truk State Public Service System, iwe ewe Board mei tongeni finata ekkoch sakkun wis a mefi pwe repwe kapichino seni ewe annuk.

2) Meininis chon angangen ewe Authority, pachenong ewe Executive Director me ewe Budget me Finance Officer, ika pwe ir mei pachenong non ewe Public Service System me mwen ar choni angangen ewe Authority ra tongeni chok sopeiemo ar kewe tufich me pung nupwen ar angang ngeni ewe Authority.

3) Ewe Board, mei tongeni ngeni noun ekkewe chon angang tetenin niwin repwe niwin, me ekkewe sakkun tufich repwe eani epwe apachanong kinikin ika non unusen ekiekin met angang ir mei piin ani non pekin muur me noomw.

4) Ewe Truk State Government epwe awora ngeni meininis ekkewe chon angangen ewe Authority me nom, ir ra tou seni ar angang non iteoch, ekkewe tufichin angang seni ar pin angang ngeni ewe Authority me ar pin angang ngeni Muun, usun chok ekkewe tufich repwe angei nupwen ar angang ngeni ewe Truk State Government me ewe Trust Territory Government.

Tetten 15. Esinesin Ngeni Municipal Governments usun Projects.

Ewe Authority epwe nochchei ne asinei ngeni ekkewe municipal government ika muun fonu ekkewe projects epwe no-ngeni inet chok muttirin fansoun mei tufich, iwe epwe pwan sopweno ne akkasinei ngeni unusen aramas me porausen ekkewe projects ika mei wor ar akkasiwin won me pwan ar atot.

Tetten 16. Kutten Fonu me Aninisin Kutten Neni.

1) Nupwen fansoun ewe Authority a mochen an epwe aeae fonuwen ika nenien emon aramas ren och an angang, iwe epwe fiti met a affat me non Sopun 16 me 17 Itenap 67 me non ewe Trust Territory Code. Ewe State Government epwe wisen eani sekining ne kut fonu me aninis non angangen kut neni.

2) Ewe Authority epwe mwitir asinei ngeni ewe State Government fansoun a mochen aeae ika angei fonuwen ika nenien emon aramas, ika fonuwen ika pisekin ewe State, ika ewe Public Land Authority. Epwe affat non ewe taropwen asinesin ewe fonu ika pisek epwe aeae ika angei, popun an epwe aeae, nangataman fansoun an epwe aeae, napanapen akkasiwin ika pwe ese fis ewe mochen, me pwinin maram fansoun epwe poputa aeaen ewe neni ika pisek. Ewe State Government epwe wor an pung me nemenem won menni fonuwen aramas ewe Authority a angei ika aeae, nukun chok ika mei affat me non Annuk.

Tetten 17. Kaworen Moni. Iei a kawor \$20,000, ika met a auchea a kawor seni ewe Monienapen Legislature-un Chuuk ren niwinin angangen me mwokutun ewe Authority. Ewe ukukun moni a kawor me non ei annuk epwe nongeneni ewe Treasurer nge ewe Board epwe wisen tumunu ren an epwe chok nounou ngeni popun mei affat non ei annuk, iwe esap wor moni epwe anussano epwe watte seni ewe ukukun mei kawor. Ewe moni epwe chok suuk me monneta ngeni ewe Authority tori an epwe poputani ne nounou. Ewe Board epwe atononga repotun nounoun ei moni ngeni ewe Legislature-un Chuuk nesoponon ew Fiscal Year, epwe affatatiw napanapen nounoun me met ese nounou.

Tetten 18. Poputan Pochokunan. Ei Namopung epwe poputa pochokunan fansoun an kapunguno me ren ewe Kepina, ika an winiti annuk nge esemwo kapunguno.

Sain seni: *Tadashi C. Wainit*
Tadashi C. Wainit, Speaker
Truk Legislature

~~*[Signature]*~~
Annetata: _____
Datasi Albert
Legislative Chief Clerk/Secretary
Truk Legislature

Pwinin maram: *October 26, 1981*

Kapunguno seni: *[Signature]*
Erhart Aten, Governor
Truk State Government

Pwinin maram: *October 27, 1981*